

որը Հասան-խանի օրով Պարսիկք եկեղեցւոյ մէջ ամուսնիքներէն կախեցին:

Ճուճանցի Սահակ եպիսկոպոս՝ որոյ համար ներկայ առաջնորդը կը պատմէ թէ նա խաչեր և եկեղեցւոյ թանկագին զարդեր գողացեր է, վանքը աւերեր է:

Սիմօն վարդապետ որ դրած է Հասան խանի միջոցին ի Բագրևանդ պատահած անցքերն, նոյն ժամանակի բռնակալներու գործերն ընտիր գրաբառով, այդ ձեռագիրն՝ որպէս շատ մի ձեռագրեր, յափշտակուած է և կգտնուի այժմ Զեարկան գիւղացի Պօղոս Մուրատեանի մօտ: Սիմօն չորս տարի առաջնորդութիւն վարելէն յետոյ՝ զիշերը առաջնորդարանին մէջ կսպանեն դաշոյնով:

(Սորա վերան ևս ներկայ առաջնորդը վատ կը խօսի):

Սիմօն վարդապետին յաջորդեց Զաքարիա, (ըստ պատմելոյ ներկայ առաջնորդի) մի տարւոյ չափ պաշտօն վարեց, վանքը աւերեց, կողոպտեց . . . :

Որոյ և յաջորդած է ներկայ Յովհաննէս եպիսկոպոս Տէր Աստուածատուրեան որ երկար տարիներ վանահայր և Պայպղիտի ու Բագրևանդայ միանգամայն առաջնորդ է:

Յովհաննէս եպիսկոպոս 62 թուին վանքը շրջապատող պարիսպներն ի հիմանէ նորոգեց, 64 թուին ժառանգաւորաց վարժարան բացաւ, ուր ուսուցիչ կարգեց այժմեան Բլուր գիւղի Գէորգ քահանայն, որ բաւական աշակերտներ ունեցաւ, որոյ քանին այս օր քահանայ են:

Վանքս քանի հատ տապանաքարեր տեսայ, որոց զլիու մօտ սկաւառակաձև կոփուած էր, մի պառաւ ինձ ասաց որ անձրևի ժամանակ այդտեղ հաւաքուած